

# DECRETUM

*SALUBERRIMÆ FACULTATIS PARISIENSIS  
in gratiam Pauperum ægrotantium.*

**A**NNO Domini millesimo septingentesimo trigesimo-primo, diebus Martis vigesimo-quinto Septembris, Lunæ primo Octobris & Veneris quinto ejusdem mensis, horâ decimâ matutinâ, ter legitimè convocata est Facultas, de pio erga pauperes ægros officio, singulis Sabbati diebus exequendo deliberatura. Cùm animadverteret consilia Medica in gratiam pauperum ægrotantium jam dudum instituta, maximum Civibus emolumentum afferre, nec parùm etiam Ordinis dignitati consulere, ut tam sapientis instituti recordatio Doctorum memoriam sæpius recoleret, neve temporis lapsu infirmaretur aliquantisper hujus officii pietas, CENSUIT consilia illa Medica anno 1639 primùm instituta, ampliata & Senatûs autoritate confirmata anno 1644, diligenter esse continuanda, visendos accuratè & omni ope Medicâ sublevandos esse pauperes ægrotantes; Quam ob rem singulis Sabbati diebus, sex Doctores, tres majoris, totidemque minoris ordinis, per Apparitores antea moniti, in Scholas superiores, post Sacrum in Scholarum Sacello celebrari solitum, unâ cum Decano conveniant, ita ut juniores horâ decimâ matutinâ, seniores horâ undecimâ accedere, omnesque usque ad meridiem remanere teneantur, ibique sedulò examinatis pauperum morbis, Medica consilia humaniter &



scripto largiantur. Sed ne propter Doctoris designati alicuius absentiam incuriamve, desint pauperibus consilia, singuli Doctores aulici, absentes, & causarii, alium Doctorem in sui locum sufficere tenebuntur. Si quis verò è designatis Doctoribus vel horâ præscriptâ, vel omnino non adfuerit, vel absens, ægrotansve alium Doctorem assiduum in sui locum substituere neglexerit, multabitur summâ duarum libellarum, quæ quidem multa, in Facultatis emolumentum cessura, in proximis quibuscumque distributionibus à Decano retinebitur, & sic unanimi omnium consensu conclusit

*H. T. BARON, Decanus.*

DATUM in Scholis superioribus diebus 25 Septembris, 1<sup>o</sup>. & 5<sup>o</sup>. Octobris anni 1731.